



KEMENTERIAN TENAGA DAN SUMBER ASLI

KERATAN SURAT KHABAR

SURAT KHABAR	:	BH			
TARIKH	:	7/7/2021 (RABU)	MUKA SURAT	:	20
JABATAN	:	JPNP			

Ceroboh hutan simpan kekal

Operasi musnah dusun durian ikut undang-undang

BH, 7 Jul
2021_20

Operasi penguatkuasaan ini dijalankan selepas mendapat pandangan perundangan daripada Pejabat Penasihat Undang-Undang (LA) Negeri

Pahang rujuk penasihat perundangan, mahkamah

Oleh Safeek Affendy Razali, Asrol Awang dan Mohd Rafi Mamat
bhnews@bh.com.my

Kuantan: Operasi memusnahkan ladang durian haram dalam Hutan Simpan Kekal (HSK) Batu Talam, dekat Raub sejak Sabtu lalu, dilaksanakan kerajaan negeri selepas mendapat pandangan penasihat undang-undang. Menteri Besar, Datuk Seri Wan Rosdy Wan Ismail, berkata pandangan penasihat undang-undang itu dirujuk susulan dakwaan kononnya operasi penguatkuasaan di situ melanggar perintah Mahkamah Rayuan.

“Operasi penguatkuasaan ini dijalankan selepas mendapat pandangan perundangan daripada Pejabat Penasihat Undang-Undang (LA) Negeri yang sebelum itu merujuk kembali perkara ini ke Mahkamah Rayuan.

“Ia sebenarnya tidak melanggar perintah mahkamah kerana kerja penguatkuasaan dilakukan di luar kawasan kebun durian yang dimaksudkan yang dimiliki oleh Royal Pahang Durian Resources PKPP Sdn Bhd,” katanya dalam satu kenyataan, di sini.

Wan Rosdy berkata, operasi itu juga tidak wajar dijadikan isu perkauman kerana sebelum ini penguatkuasaan sama dilakukan di Sungai Ichat dan Lembah Bertam, Cameron Highlands, masing-masing membabitkan pekebun India serta Cina.

“Di Kechau, Lipis pula membabitkan pelombong emas Melayu. Oleh itu, saya berharap operasi di HSK Batu Talam ini

tidak dijadikan isu perkauman,” katanya.

Wan Rosdy berkata, kerja penguatkuasaan itu bermula Sabtu lalu hingga 2 Ogos depan atau selama kira-kira sebulan.

“Operasi penguatkuasaan membabitkan kebun haram, termasuk tanaman durian ‘Musang King’ dalam HSK Batu Talam berkeluasan kira-kira 101.17 hektar.

“Ia termasuk menahan mana-mana individu dan pekebun memasuki kawasan HSK Batu Talam tanpa kebenaran, serta turut menyita barangan dan kenderaan.

“Dalam tempoh dua hari operasi, 22 individu ditahan, termasuk 18 orang pada Ahad lalu, untuk siasatan mengikut Akta Perhutanan Negara dan Kanun Keseksaan,” katanya.

Beliau menjelaskan, ia sebenarnya adalah operasi penguatkuasaan biasa, tetapi mendapat tentangan dan provokasi dengan kata-kata kesat dikeluarkan ter-

hadap pegawai serta anggota penguat kuasa.

Sementara itu, JPNP berdepan halangan pada hari ketiga operasi berkenaan, kelmarin, termasuk empat lantai simen jambatan yang mahu dilalui, dipercayai dirobekkan pihak tidak bertanggungjawab.

Ketua Penolong Pengarah (Penguat Kuasa) JPNP, Nor Azrim Ahmad, berkata halangan terbabit menyebabkan operasi tidak dapat diteruskan mengikut perancangan.

Sebelum itu, sebuah kenderaan pacuan empat roda menghalang laluan selepas tayarnya dikatakan bocor, namun ia disyaki helah untuk melengahkan operasi.

Di Kuala Lumpur, Ketua Polis Negara, Datuk Seri Acryl Sani Abdullah Sani, berkata polis menggerakkan Pasukan Gerakan Am (PGA) bagi menjaga ketenteraman awam di Raub susulan insiden kekecohan membabitkan pekebun durian

Wan Rosdy Wan Ismail, Menteri Besar Pahang



dengan anggota penguat kuasa, kelmarin.

“PDRM tidak akan berkompromi dengan pihak yang cuba mengganggu-gugat pihak berkuasa sedang menjalankan tugas,” katanya.

Mengulas tindakan beberapa ahli politik merentas negeri dan daerah untuk memberi sokongan kepada 18 pekebun durian yang ditahan itu pula, Acryl Sani berkata, polis sudah membuka kertas siasatan berhubung perkara berkenaan.

Beliau berkata, tindakan sewajarnya akan dikenakan jika terbukti berlaku pelanggaran prosedur operasi standard (SOP) kawalan pergerakan dalam Pelan Pemulihan Negara (PPN).

Unit Komunikasi Korporat | Kementerian Tenaga dan Sumber Asli
No. Tel. : 03-8000 8000 | Faks : 03-8889 4763 | Web : www.ketsa.gov.my



KeTSAMalaysia



ketsa.malaysia



KeTSAMalaysia